



ZHONGGUO JIUWENXIAN
SHIWEN JICHENG

中国酒文献诗文集

第五册

宋辽金元酒诗文集三

李修余 彭贵川 胡春秀 编著

 中国文史出版社


中国酒文献诗文集成



ISBN 978-7-5034-9866-4



9 787503 149866 >
定价：6800.00元
(全八卷·十册)



ZHONGGUO JIUWENXIAN
SHIWEN JICHENG

中国酒文献诗文集

第五册

宋辽金元酒诗文集三

李修余

彭贵川

胡春秀

编著



中国文史出版社

王益之

王益之，字行甫，浙江金华人，师古子。淳熙十四年（1187）登进士第，绍熙中为分水尉。嘉定初为太学博士，仕至大理司直兼评事。精两汉故实，有《西汉年纪》三十卷、《汉官总录》十卷等。

分水县行乡饮酒记

绍熙辛亥之孟春，宛陵奚君来令兹邑。距宛陵不二百里，风声习俗往往不大异。奚君缘人情以为政，故孜孜得民和，毋有悍而弗迪者，始信人心之易感、礼教之可兴。凡世之健吏，属意于操切整齐者，皆过也。

岁未尽六日，乃即县庠行乡饮，悉采择古礼与开元、绍兴所已行者杂就之。虽其间颇有所增损，大抵多袭仪礼之旧。令为主，择乡人之有行义年者为宾，咸推高承奉郎致仕王君迁，令亲往迎致。复以王君曰烜为介以辅宾，余以簿尉摄僎以辅主。下是有三宾，又下有众宾，尊卑长幼，烂然有第。乃立司正以纠其不则，行礼者莫不肃敬抑首。时王君承奉年九十余，老不任拜起，而主人以百里之长，仆仆亟拜，成礼而去。邑人粹观者，莫不咨嗟叹息，然后知德齿之可尊，世俗所谓气势云者，盖不足尚也。明年季冬之十日，复讲故典，承奉以疾不至，乃请迪功郎致仕俞君汝弼为宾，朝散郎、新通判蕲州王君瑒为介。自主、僎、三宾、司正而下，悉仍旧。其仪制加详，行礼者益习，邑人以观礼，至不惮数十里之远，是岂一旦声音笑貌所能感哉！

始余闻中兴以来，当干戈甫定之余，首诏郡邑举行乡饮酒，故老犹能道其事。余以生晚，恨不身当其时，窃自鄙陋。不图至此，令君再举盛典，俱获以身周旋其间，是独不喜且幸与！

奚君请记其事，以诏来者。余复于君曰：夫礼未易兴也，必情文具举而后兴。昔汉唐举行是礼，史不绝书，而虚其应，非秩录也，徒恃夫升降揖逊以为礼，而情不加焉，则音存而操已变矣。今君好善之心，优于疾恶，自反之念，愈于责人，是固有兴起于其先者，宜乎是礼之行，而应不旋踵也。愿君继以无倦，益有以信于邑人之与行礼者，且归以转语其子弟族姓，以期无负于君，敬长上，肃政教，顺乡里，出入不悖所闻。非独今君举行之意为不虚，或由是推而及旁郡国，以达于天下，使夫人皆知王道之易易，古礼之可复，不以时异事殊为解者，寔自吾邑始，是又独不喜且幸欤。

余因为之记，以竣其成。奚君名士达。余金华王益之也。（中华书局一九八六年影印本《永乐大典》卷一二〇七二）

王良臣

王良臣（？—1218），字大用，潞州（今山西长治）人。金章宗承安五年（1200）进士。入翰林，与李献能善。兴定初，从李天英北征，没于军中。赠孟州防御使。作诗以敏捷称，长于律诗。

旬休饮

袅袅东风雪外还，又催春色动溪山。百年莫作千年计，十日须谋一日闲。千丈归心诗卷里，一襟豪气酒杯间。醉鞭约住黄昏月，马首低悬玉半环。（文渊阁四库全书本《全金诗》卷二十八）

危稹

危稹（1158—1234），原名科，字逢吉，自号巽斋，又号骊塘，抚州临川（今属江西）人。淳熙十四年（1187）进士，调南康军教授，擢著作郎兼屯田郎官，出知潮州，又知漳州。

经从丰城谒于房州于令侍姬歌舞进酒二首

蛾眉对歌舞凉伊，舞身还逐歌声齐。卷花万段忽进酒，斩高蝴蝶飞来低。

更有佳人在空谷，能唱春风天上曲。何时得上金玉堂，一声飞度龙吟竹。（文渊阁四库全书本《两宋名贤小集》卷二百六十五）

李壁

李壁（1159—1222），字季章，号雁湖，又号石林，眉州丹稜（今属四川）人。李焘之子。以父任入官。绍熙元年（1190）进士。二年，除秘书省正字。五年，为校书郎。宁宗即位，徙著作佐郎兼权礼部郎官。出知阆中，历知汉州，提点夔路刑狱。嘉泰三年（1203），除秘书少监，权中书舍人，累迁权礼部侍郎。开禧元年（1205）使金贺生辰，还言兵未可轻动。二年，为韩侂胄起草出师诏书，进权礼部尚书，拜参知政事。韩侂胄诛，谪居抚州。有《雁湖集》，已佚。

好事近 钱交代劝酒

莫惜一樽留，共醉锦屏山色。多少飞花悠飏，送征轮南陌。

曲湖归去未多时，还捧诏黄湿。生怕别来凄断，看满园行迹。（中华书局一九九九年版唐圭璋《全宋词》第四册）

江神子 劝酒

露荷香泛小池台。水云堆。好风催。宝扇胡床，无事且徘徊。帘外海榴裙一色，判共酌、两三杯。

此怀能得几番开。玉山颓。不须推。回首慈恩，前梦老堪咳。好是上林多少树，应早晚、待公来。（同上第四册）

阮郎归 劝袁制机酒

苏台一别费三年。锦书凭雁传。风姿重见阆江边。玉壶秋井泉。
翻短舞，趁么弦。篆香同夕烟。多情莫惜为留连。落花中酒天。（同上第四册）

韩泂

韩泂（1159—1224），字仲止，号涧泉，信州上饶（今江西上饶）人，元吉子。有高节，从仕不久即归信上。嘉定十七年卒，年六十六。其著述今存有《涧泉集》二十卷、《涧泉日记》三卷。

上饶禊饮

流芳报花信，畅叙记东晋。何知胸崔嵬，未觉景急峻。泛觞河阳春，庶且雅俗镇。（文渊阁四库全书本《涧泉集》卷一）

回路雪作野酌

适俗心不夷，索隐山不深。驾言出春浦，回车已留阴。雪飞催我句，村酌且重斟。此致天所资，优哉有遗音。（同上卷一）

过新安月夜步浮丘亭分韵赋诗得弄字

平生风月怀，醉语或惊众。休倾袁绍杯，且卧毕卓瓮。使君良不凡，客子恍如梦。对影将奈何，晓角梅花弄。（同上卷二）

周景瑜置酒东园看海棠分韵得上字

春光作花事，领略过溪上。寒凄风雨余，草树亦舒放。红深海棠径，蜀锦开步障。得酒一以醉，幽情为之畅。主人良好事，举白欣相向。坐间多豪英，笑倒语弥壮。归涂踏微潦，满目列青嶂。顾予何为者，追随生怅望。（同上卷二）

载酒送昌甫至十许里分韵得送字

翁归章泉山，我以一尊送。荒流忽逢梅，孤峭费嘲弄。情亲阔别去，旋即堕幽梦。风生千树春，寒入万木冻。杯行二三子，醉语或惊众。岁晚夫如何，尘外无倥偬。（同上卷三）

行甫载酒为别

霜天出晴日，山外看烟霏。长松覆兰若，酌我何当归。人情令飘洒，世路徒依违。景旷诗自



成，一觞还屡挥。（同上卷三）

斯远云闲睡醉天下之至乐也约各赋一首寄昌甫（三首选一首）

陶陶兀兀里，浑涵忘所知。恍如天地初，清浊未剖时。人苦前识尔，触物劳心思。弃置便弃置，况此有酒卮。一酌入醺酣，重觞到淋漓。勿苦事边幅，醒将何所为。（同上卷三）

同醉僧夜坐郑一书房

空山带荒溪，小窗语寒灯。寂历岁云徂，醒眼犹拊膺。访友得幽伴，无人醉闲僧。地炉火深红，瓶梅影翳髯。（同上卷四）

二十五日文蔚携酒诣夜同访郑教授

携酒问吾党，有诗当岁穷。城头数疏更，窗外飞过鸿。悠悠澹澹里，忽忽茫茫空。我尔且一杯，古今多三公。（同上卷四）

酒熟

意绪忽不整，瓮头新酒香。雨细起暝色，天低漏寒光。残花菊枝短，老叶枫树长。取醉乃吾事，山空欲清霜。（同上卷四）

庵邻王家两送酒来

渴饮对空觞，俯仰自长喟。赖有田中邻，时时遣酒至。欢言斟酌之，感彼勤重意。漂母哀王孙，从古多此类。泽畔且行吟，春风尚堪醉。（同上卷四）

二十七日同郑一尹一上高泉夜醉而作

生死本一致，贤愚同一科。高泉寺前水，春风静流波。曳杖揖残僧，奈此世谛何。栖贤堂外祠，莫待叩角歌。（同上卷四）

醉书

槌碎黄鹤楼，吸尽西江水。索酒可以起，吹灯照无睡。夹城溪汤汤，负郭山靡靡。逢花其命乞，蓬心我蓬累。（同上卷四）

次公留饮

清霜水南夜，海运一杯酒。不知千古，而得二三友。君未可青眼，我只是白首。吟哦醉梦间，共赋无何有。（同上卷四）

孙行之国录相过同饮传庵水阁因与王校棋

春余却扫坐，衡门车马音。青云有达士，意行来涧阴。言诗取酒饮，命友以棋吟。老怀为相羊，无闷良在今。（同上卷四）

尹一家同孔道士饮郑一继至

岁暮出门去，玉溪城郭深。故家诚可数，高士亦过临。坐久狂客来，身老皤鬓侵。咄咄酒未醉，谐笑方侵寻。（同上卷四）

同赵判院桂秀才过太霞广信看雪因饮涧梅

山色富昏晓，涧痕余浊清。惟诗是我兴，不饮非人情。思仙穷有顶，入寺说无生。冷蕊疏枝底，夜归虚籁声。（同上卷四）

教授同太守过横碧因留教授一饮

班坐横碧轩，便足了吾事。水南冻雨中，岁晚欲何为。人生衰荣尔，翻覆当有自。使君真不凡，宾从随听视。偶然理窗楹，岂曰登临地。吕曾骨已朽，方来重增喟。萧闲著我老，婆娑恐容易。惜乎一杯酒，未敢驻千骑。梅花山翠寒，孤香发清吹。（同上卷四）

谢章令率同官载酒

宿麦雨可种，野梅冻欲坼。令君领宾从，假日访幽僻。阳升正初辰，道泰知有日。觞行既频屡，谈至或愤激。眷言数君才，何乃辱此邑。大夫如豫章，建厦固所急。簿公名家驹，荐士宜首及。尉曹学省彦，求盗岂其职。征官伟丈夫，名宦终见迫。顾我独亡赖，甘作山林役。定迁且半载，未有如（原缺二字）。溪山为欣豫，闾里争诵说。意同邀陶潜，事异过执戟。人事果好乖，推迁已畴昔。（同上卷四）

对酒

马周新丰酌，谁能复悠然。孟公投辖饮，有客亦可怜。君当恕醉人，渊明真欲眠。速相就一斗，杜老青铜钱。何如山牖秋，指点邻瓮边。（同上卷四）

赵将招饮南池

暮春南池上，游朋一追随。岂不能把酒，亦复多成诗。主人歌声长，尘务谁思惟。握手到尔汝，却恨杯行迟。是身既长闲，便觉处处宜。秉烛夜向深，明月忽如斯。勿使儿辈觉，甚矣吾独衰。（同上卷四）

宿九峰次早黄八哥载酒来

鹧鸪鸣山翠，松日行晓光。一庵远市廛，自惜宜自藏。瑟瑟闻人迹，熙熙见壶觞。老境为献酬，笔到诗成章。（同上卷四）

小酌山圃

朔风起山雾，四望多浮阴。人情逼岁除，梅花照高林。兴言一樽酒，岂顾杯浅深。可醉便须醉，丘中有鸣琴。（同上卷四）

吴推官同昌甫诸人饮涧上

世味嚼蜡尔，临风强吟哦。故人今谁来，门前车马多。招邀忽聚集，款曲成婆娑。齿发我已老，岁月如掷梭。有酒不为饮，奈此好事何。分题咏清趣，但恐俗所呵。吴侯金闺彦，公余乃相过。欢笑酬座人，时春复清和。濯我涧上泉，因之而啸歌。（同上卷四）

同景瑜诸人饮于横碧

老我强言笑，因人闲往还。凄风落寒雨，野寺藏空山。寄怀文字中，放手杯酒间。衰草翳石梯，长杉映柴关。

夜色起佛屋，遥遥一钟鸣。年运今何时，共此觞咏情。竹炉煨深暖，纸窗留微明。举手揖坐客，为善无近名。

残僧项黄稿，兀兀度朝昏。摩指因睡眠，苦寒常闭门。炉熏柏子香，客来忘所言。试与之饮酒，亦尽一瓦盆。

岁月不待人，初寒迫深冬。慨予歌声长，天地亦改容。歌罢掷酒盏，忽然动昏钟。风余雪霏霏，鸦栖雁雝雝。（同上卷四）

次公书室小饮

南屏有幽窗，焚香读道书。林声起肃霜，寒事亦淡如。安时可娱老，静□心地初。谁欤主与宾，酒酌方舒徐。（同上卷四）

月夜散步浮桥因取酒与诸友小饮

出谷秋水上，夜桥风月凉。斗柄插斜河，露气垂云光。取酒为更酌，四顾一笑长。归径黄叶干，雁鸿正高翔。（同上卷四）

酒熟

意绪忽不整，瓮头新酒香。雨细起暝色，天低漏寒光。残花菊枝短，老叶枫树长。取醉乃吾

事，山空欲清霜。（同上卷四）

庵邻王家两送酒来

渴饮对空觞，俯仰自长喟。赖有田中邻，时时遣酒至。欢言斟酌之，感彼勤重意。漂母哀王孙，从古多此类。泽畔且行吟，春风尚堪醉。（同上卷四）

十四日推枕引酒信笔书此

空云春昼长，明晦苦参错。连朝服衾枕，疲茶不可作。岂唯虑归舟，去没逢蛟鳄。卧闻耕桑家，种败蚕栖箔。忧来故耿耿，政尔须杯勺。酸甜无正味，聊以慰寂寞。譬如无弦琴，亦寓山水乐。（同上卷四）

读渊明饮酒诗

山水幽绝处，吾亦难为情。此道世莫讲，肯计身后名。徇名与逃名，俱若可怜生。百年能几何，大半宠辱惊。醒醉一昭彻，本来孰亏成。（同上卷四）

夜过霞山看赵百醉诗刻及诸名胜跋语（二首选一首）

抚我百醉诗，把此一杯酒。水南撼霜飙，山月复在牖。禅家话三三，伯主约九九。得友良独难，呻吟倍搔首。（同上卷四）

二十七日置酒钱昌甫雪作次张上饶韵

揭来固意愜，倏去诚愿违。敢云一语是，未省百事非。春雪遽落落，春花亦菲菲。举手酬座人，酒美翁不归。（同上卷五）

次韵昌甫同酌宋知军家酿

雅俗岂殊调，城郭山林分。知君心事宽，一笑鸡鹤群。邂逅多□客，酒亦为之醺。庾信哀江南，李白日暮云。白头几青眼，吾人尚可云。夜阑拥鼻吟，天香桂纷纷。（同上卷五）

小酌钱耿运干赵推官分韵复和韵

山林闲放身，幽意苦不愜。因来我壶觞，且送尔官牒。池莲红未葩，园笋绿已叶。去住岂愿违，人寰付尘劫。

痼疾已烟霞，药石从美疚。谁怜名宦迟，我觉幻化迅。兴与山孤高，语带涧深润。去去上下塘，应劳青眼瞬。

勿云杯酒阑，且认语笑密。婆婆真一老，跌宕忻六逸。交游贵忘年，志意当惜日。舒而有鼎彝，卷而有篇帙。（同上卷五）

和韵（三首选一首）

酒亦关何事，片片流仙霞。用之涤肺肝，相与成诗家。一酌且濡唇，再酌深到花。持杯两相笑，吟哦入幽遐。笔落岂知醉，何者是生涯。（同上卷五）

赵十同饮

君家兄弟非他人，与尔同寓冰溪滨。醉吟浪宕只这是，天地混沌疑非真。琢得一句两句出，未必魂魄无精神。知我罪我春秋经，王霸隆替俱埃尘。（同上卷六）

春浦门外看梅因饮宋氏小轩

春晴晚步春浦门，小饮醉入梅花村。繁香吹雪数十树，青山远近疏篱园。谁家水竹明窗轩，老我清坐俱忘言。须臾烟月光吐吞，归哉楼角横黄昏。（同上卷六）

昌甫寄酒蛤辣螺新蟹皆山味所久无

蛤蜊因酒得天全，踞无龟壳吾非仙。六跪二螯犹回旋，左手急持思拍船。螺之辣者真海鲜，每或酌侑能醒然。竹隐君其诗中权，知我托落醉欲眠。走送三物寸简传，青灯山牖瓶梅边。食之既矣吟一篇，比耶兴耶今何年。（同上卷六）

次韵昌甫仲春读谪仙诗

渊明太事多，汲汲泥诗酒。子云良自苦，载醪竟何有。芭尊太玄八十一，统集饮酒二十首。我贵知我希，却扫且缄口。（同上卷六）

溪路邂逅傅骐骥之在所沽酒话别

凉风吹溪雨吹蓬，故人意气俄相逢。停驂为我一小饮，西湖东望两高峰。人间万事俱华发，雨歇风清有佳月。不须千里苦相思，得酒陶然已兀兀。（同上卷六）

上饶送番江酒次韵谢之

荐福湖边酒，能来为一中。僦庵知祖道，鄱郡见家风。治县聊绥抚，诗坛更长雄。名章敢酬唱，雨后夕阳红。（同上卷八）

十五日玉山道中见文蔚买酒送之

雪岭吹寒雾，行田过远村。班荆得佳士，促席置清尊。官业从兹始，离怀不用论。洋洋晁董对，指日上金门。（同上卷八）

小酌钱耿干运赵推官分韵复和韵

潜鱼空浪藻，倦翼漫风林。邂逅留连饮，从容取次吟。名言惊思苦，离话惜情深。昔尔那知此，他还未必今。

雨歇收朝润，风回起夕凉。君今过泮浦，客有到钱塘。落涧高槐影，浮檐细竹光。寻思须浪赋，杂伯更谈王。（同上卷八）

二十七日周七载酒且怀春伯

十载梅陂酒，青岩始共游。香传高树晚，凉映小塘秋。饮亦何劳醉，吟成苦未休。补陀山下客，能为此回头。（同上卷九）

施重益留夜饮

秋闲得幽讨，竹涧款门时。绝壑通流水，横桥壅断陂。岩花已芬郁，山木未凋披。静夜持杯酒，人清更说诗。（同上卷九）

小饮春山

细雨初冬夜，溪山书院灯。闲来四五辈，留饮两三升。久坐形神定，高谈意气增。我归眠蕙帐，谁信在家僧。（同上卷九）

同昌甫陪朱虞卿约尹郑二士饮食艮堂

到处逢春酌，闲吟过此生。落花亭上饮，芳草岸边行。我亦非无兴，人应不负情。风光共流转，楼外远山明。（同上卷九）

朱虞卿以诗送家酿和韵

绝叹交游落，何论比与周。座开今日酒，门款昔年秋。濯锦江头杜，玄都观里刘。相望风雅在，天地一虚舟。（同上卷九）

王校以诗送笋及一壶

涧道迷蓬藿，山空且熟眠。雨多从蔽日，风横任吹烟。欢喜收笈翰，提携到酒泉。更逢初斲笋，急急和新篇。（同上卷九）

黄仲明同看池上菊一酌因出溪桥久之

饮菊明山日，行林挟岸风。近霜虽落木，得雨自成丛。小醉情怀外，微吟步武中。幽闲有如

我，邂逅复心同。（同上卷九）

灵芝寺清坐听潘德久弄琴久之小酌而散

秋晚灵芝寺，阴云阖复开。荷枯半倚草，柏老遍生苔。兴到容吾赋，闲知与客来。琴边更三迭，莫放酒船回。（同上卷九）

次公招饮余子寿同坐

老觉过从少，斯文恐不然。参天两玉树，忽堕一杯前。意象心非石，谈锋思涌泉。冰霜冻梅蕊，满眼是新年。（同上卷九）

纵酒

纵酒非能饮，长言未是诗。年华除夜逼，心事故人为。君欲醉须醉，我还归便归。南窗到南涧，官柳野梅知。（同上卷九）

寻诗按酒

拔卒寻诗将，同朋按酒兵。巢由空自洗，沮溺向谁耕。城市时来往，乡村日送迎。任之多论秀，分矣只编氓。上郭如拳大，南溪指掌平。醉随吟力去，归隐紫云生。（同上卷九）

重午乏酒戏成

小楼清坐意何如，休沐虽闲叹索居。解粽未忘良夜饮，研朱犹作午时书。风生暝色天横幕，云卷晴光月吐梳。朗诵《离骚》抚空案，独醒笑杀楚三闾。（同上卷十）

九日不饮

风光流转又重阳，午梦初回意愈伤。时序肯随人境异，江山空对晚天长。年华冉冉秋将老，物色班班菊自香。虽少一觞还一咏，恍然身世立苍茫。（同上卷十）

登一杯亭

当年丞相一登临，酒畔峥嵘万古心。重整乾坤归庙社，却留岁月在山林。荒寻野阁甘棠蔽，名占高台岷首深。见说治中新筑就，肯堂三叹有遗音。

旄麾谁不典方州，何事邦人记昔游。时令纵非名转盛，灵山如画水西流。吾侪只得诗模仿，尔辈焉知酒拍浮。却忆环滁最佳处，醉翁亭子至今留。（同上卷十一）

题司马寺丞约汪倅赵倅携酒相过涧亭

溪山前后簇双旌，暇日城南取次行。因到小园寻胜事，更于野寺畅幽情。联翩别乘同歌吹，落

拓闲民亦兕觥。元佑相家文物在，唤回洛社旧升平。（同上卷十一）

涧东临水饮梅花尚未全放一树独佳

残雪余寒二月来，涧东犹是欲开梅。夕阳影澹初寻句，流水声清更把杯。取友唤邻相领略，破荒择胜独徘徊。谁能折向南枝醉，一阵繁香扑麝煤。（同上卷十一）

雨中看梅一两家小酌

春雨梅花湿小园，断桥流影动黄昏。人家节近多留话，故旧闲中或置樽。落落鴈飞知隔浦，荒荒犬吠是前村。市廛只在烟林外，但恐溪添野水浑。（同上卷十一）

赵簿留饮望城里海棠因思履道且寄民瞻

相望海棠思故人，最高台是北城闾。看来先自花饶笑，兴到从他酒入唇。语燕既归惊作社，盟鸥何在且行春。妙年秀发如君少，桃李纷纷只世尘。（同上卷十二）

寄彦升九日前一日饮其家

稻田陂水菊花天，新筑轩窗醉酒边。情味故人如昨日，襟期闲客又今年。沉思节序俱同梦，剩赏风光甚欲仙。屋上青山展图画，雁翻秋影下平川。（同上卷十二）

徐和卿潘文叔溪楼夜饮因送之永丰

良天佳月共中秋，绿水青山一倚楼。今古情怀只如此，几多杯酒可销愁。得随撰杖平生愿，又向干封数日留。湖海交游难定准，眼明烟鸟下沧洲。（同上卷十二）

光庭得节同彦章置酒江亭作别

青山吴越晚潮天，领客登临合醉眠。且抱风流寻酒盏，更移襟度入诗编。雁行未许归舟速，凤阙犹看使节旋。处士一星人物表，往来书剑本超然。（同上卷十二）

九月二十五日仲至携酒与客相过因为作生日次韵春时所赠

名胜相从餐菊英，楚骚情味是三生。会逢其适论奇字，进退之间付濯缨。览德凤凰非苟集，俟秋蟋蟀也须鸣。诞弥俾尔耆而艾，况复村酤煮芋羹。（同上卷十三）

送耿运干当湖酒所

一自西风散芰荷，殷勤风雪更婆娑。经年谁谓酒边少，此日我云林下多。才俊荣亲当折桂，时清禄仕且嘉禾。论交论契无余语，收入离筵入短歌。（同上卷十四）

山中上巳宋六成甫见过留饮

风光流转景常新，且乐林泉自在身。曲水流觞知上巳，落花啼鸟近残春。快倾座上一壶酒，莫染人间半点尘。兀兀篮舆好归去，路平微雨草如茵。（同上卷十四）

尹一留饮次其韵

冬来何意酒杯宽，旧话新愁转转难。落叶满城吹薄暮，浮波夹岸起清寒。方斋留客情无已，上郭归人兴若阑。天地之间是襟谊，淋浪赢得洗悲酸。（同上卷十四）

潘德久置酒柳洲小楼

几年九日西湖酒，此际从公把菊花。酬唱不知留客舍，登临无奈得诗家。水舟又掠空潭浪，山屐经行两岸沙。白发清尊乃如许，数株杨柳傍楼斜。（同上卷十四）

诗谢文显兄弟载酒并简子畅

几椽牢落依僧住，二妙殷勤载酒来。名节似君真有道，交游着我定怜才。谭高屡激清风起，归近何嫌落日催。苦忆平生溧阳尉，驱车政尔犯黄埃。

柱杖敲门借竹看，步随纡曲转林端。架边绿蔓阴成幄，桥下清流春有湍。君作屋庐嫌近俗，我因岩谷遂深盘。倘思出郭少尘事，或命中车初不难。（文显颇乐山居之胜，故云）（同上卷十四）

余计院父子以我乏酒连以一壶为饷

冷坐楼窗欲雪天，空搔华发泥尘编。不嫌酒尽西湖上，安得诗如南涧边。剥啄故人还饷我，开尝余味信能贤。公家父子何多事，今日碧香犹卓然。（同上卷十四）

酒尽

连宵风月颇堪看，酒尽端怜赏咏难。岂但街头沽苦贵，更缘秫早酿多酸。萧萧陶径柳将落，渺渺吴江枫欲丹。安得酒船数百斛，拍浮长遣一生欢。（同上卷十四）

访吴推官津亭因唤船小酌而归

沿洄舸泊更跻攀，好事来寻小艇闲。却忆武昌游赤壁，可怜姑熟醉青山。岸凉崦霭知空谷，水远汀沙见浅湾。惜别且同幽兴熟，鱣鱼泼泼鸟关关。（同上卷十四）

饮横碧轩

僧舍颓檐屋一间，吕曾南渡此看山。风光流转人虽远，诗句磨镌景自闲。好事肯同携酒至，青

春又见来年还。坐中野老醺然醉，指点梅花亦可攀。（同上卷十四）

谢户曹载酒见访

闭合烧香正寂寥，忽看结客过衡茅。溪山有味真堪乐，松竹无心肯绝交。老树枕流倾社瓮，凉风吹月上山谿。浮梁饮散各归去，夜静水明摇柳梢。（同上卷十四）

喻伯经推官约施翔甫父子载酒涧上

丽泽同窗不一人，是时文物动簪绅。年来此话谁能问，老去知君我独亲。天下传闻难见道，世间来往易知津。持醪野路江梅底，后会相逢意转真。

岁晚寻梅又一年，南山岩下涧溪边。雪残古路初何似，诗到前村更隐然。邂逅襟期元拔俗，从容宦达自登仙。奉亲携幼人之乐，赢得朋来棹酒船。（同上卷十四）

小集清晖阁因唤渡把酒昌甫偕至

小醉清晖阁，横江更一杯。远山寒日晚，诗老忽然来。（同上卷十五）

王丞留饮

寻梅闲唤酒，邀友漫题诗。酒美君方醉，诗成我未奇。钟声来远寺，暝色起前溪。霜夜断鸿急，风庭落叶知。（同上卷十五）

访滕贤良邂逅周察推同饮池上

春风杂花池，宾主两相视。落日忽已晴，洗盏可无醉。（同上卷十五）

次韵周倅送郡酝

闻道菖蒲节，龙舟一一修。雨凉虽少愆，郡圃不妨游。坐有严陵守，新持使节长。真成三学士，意象好持觞。（同上卷十五）

白日偶无客青山长对门（十首选一首）

牵牛槿花底，欹柱破篱门。旋买深村酒，因倾老瓦盆。（同上卷十五）

横山堂小酌

酒浇碗礪不下，诗用陶写亦难。折取茶蘼芍药，醉于绿水青山。（同上卷十五）

戏赠成季

拂拂溪烟横暮，丝丝小雨吹凉。酒尽更呼载酒，一觴一咏行藏。（同上卷十五）

九月二十日

渊明笑杀惠远酒，己公消得杜老诗。诗酒于人亦何事，夜霜吹冷水南枝。（同上卷十六）

喜晴

喜晴方且启柴门，忽有人来倒一樽。只道久闲常荡荡，不知小醉已昏昏。（同上卷十六）

六月二日大雨如注山涧水溢（四首选一首）

瓮头白酒香初酿，凭借一杯归太和。本自无愁更何喜，暑风池上看圆荷。（同上卷十六）

偶成（十首选一首）

病余倦甚唯思睡，醉里欢来拟欲颠。饮罢空山身老矣，梦回清暑意翛然。（同上卷十六）

冷寻

冷寻杯酒涤书痴，半盏微醺又到诗。门外屡成三尺雪，茫茫眇眇欲何之。（同上卷十六）

和周次公韵（二首选一首）

武夷仙客话尊前，转觉相忘失醉眠。诗眼文心既如许，古今才调岂徒然。（同上卷十七）

次韵缪教授（二首选一首）

若无交友可忘年，馈岁何由得酒泉。不是骚人太多事，定无家酿与吟篇。（同上卷十七）

次韵吴推官（五首选一首）

因酒从容意已仙，白沙翠竹记同船。停杯更在斜阳外，此话他年尽可传。（同上卷十七）

仲至早入局有诗次韵因亦自述并谢外日留酌

驰道人行响动雷，五更推枕重徘徊。归家细咏朝阳句，不记曾经省宿来。

持蟹重倾酒一杯，晚钟寒色共徘徊。近年得此于人少，公不招呼我亦来。（同上卷十七）